



Senin, 06 September 2021
Ogen: Ezekiel 14: 12-20



Kinutekenandu Engelholi Kam



Nuah, Daniel ras Job, eme tokoh si erkiniteken man Tuhan. Teluna ia erkandu-kandu ras Tuhan. Lit lalap waktuna ercakap-cakap ras Tuhan, ibegikenna kal Kata Tuhan dengen patuh i bas ndalankensa. Megati pagit nge si man nanamen, mberat si man baban, tapi la erbahansa ia teluna ndauh ras Tuhan. Nuah isaling-saling ras itokohi erkiteken mbangun bahtera i datas deleng, Daniel itamaken ku gua singa erkiteken kesetianna, Job ngenanami pinakit si mesangat seh ndeharana pe numpahisa. Si pagit e pe jadi entebu erkiteken kinitekenna man Tuhan. Terkelin ia sabab Tuhan temanna.

Nina Tuhan man Esekiel, kiniteken si telu kalak e terjeng nelamatkan ia ngenca, labo ia ngasup nelamatkan anak-anakna di kune Dibata nehken ukumenNa. Sura-sura Tuhan nehken ukumen man negri si la erkemalangen man baNa. IkernepkenNa persedian pangan, ibahanNa i je kelihen, itamakenNa ku negri e rubia-rubia si merawa seh maka negri e dem alu kebiaren. ItamakenNa ku je pinakit laya-laya, melala mate subuk manusia bage pe rubia-rubia. Di kune Nuah, Daniel ras Job ringan i bas negeri e, labo ia ngasup nampati manusia si lit i je. Si ikataken Tuhan e labo ngasup manusia nelamatkan manusia. Uga gia paguhna kinitekenna man Tuhan.

Kinitekenndu erbahansa kam terkelin. Kata enda ngajuk kita tetap ernalen man Tuhan labo man manusia, amin uga gia manusia e hebatna. Kai gia sekali jadi i bas geluhita, pagit, susah, mberat si man alanken tetap setia man Tuhan. Di kune enterem sekelewetta nundalken Tuhan erkiteken beratna baban bas geluh enda, kita tetap ngerembakken diri man baNa. Tuhan si erdolat, IA kal ngenca si ngasup mulahi kita i bas kerina perbebenta. Di kune sedekah enda siakap lit gegeh si deban si ngasup nampati kita, wari enda kita ipersingeti, 'mulihlah kempak Tuhan.'